

zrjadować a z nowymi dodawkami rozmnožiť. Přez přečelnu pomoc někotrych knjezow, wosebje duchowneho Seilerja a wučerja Wehle, je so ličba serbskich přisłowow a přisłownych prajenjow, kotrež su tudy wozjewjene, krasnje přisporila; přetož hdyž dotalne zběrki w Magazinjce, w Pěsničkach a w Lětopisach bjez sobu přirunamy, namakamy tam wšo do hromady jenož něhdže poldra sta přisłowow a přisłownych prajidmow wočišćanych.

Při wozjewjenju tuteje noweje zběrki budź hišće na dwoju wěc spomnjene.

Ryčespytny wotrjad Maćicy Serbskeje je we swojich posedženjach bjez druhimi džělami tež tule zběrku po kruchach kritiscy rozsudzał, tak zo móže so ta sama we tutym nastupanju za kritiski text powažować.

Dale chcemy tež na rozdźelenje přisłowneho materiala spomnić. Něšto druhe hač woprawdźite přisłowa (proverbia) su wšelake přisłowne prajenja (proverbialiter dicta). Při dalšim a hłubšim rozsudžowanju tutych přisłownych prajenjow abo prajidmow nasta ta myslička, hač so te same njebychu na sěchowace wašnje rozdźelić móhłe:

- 1) přisłowne přirunanja (comparationes proverbiales),
- 2) přisłowne hrónčka (enuntiationes proverbiales), a
- 3) přisłowne poryčadła (phrases proverbiales).

Na tajke wašnje nasta sěchowace rozdźelenje:

- A. Přisłowa, npř. kajawki njejsu wróćawki.
- B. Přisłowne přirunanja, npř. stać, kaž měch rěpy.
- C. Přisłowne hrónčka, npř. jemu Němc na hubu bije.
- D. Přisłowne poryčadła, npř. liški honić, mydło wjesć.

Lubi serbscy bratřa! Kóždy je lubje prošeny, zo by přisłowa bjez ludom po swojej móžnosći zběrał. Hladajmy tute drohe pokłady swojeho luda hromadzić a před zahinjenjom wukhować! Duž tež na přichodny tysac serbskich přisłowow:

„Daj Bóh zbožo!“ — „Daj to Bóh.“

J. B.